

# Galicia Encantada



ANIVERSARIO  
2005  2025  
Enciclopedia de Fantasia Popular de Galicia

## Calendario

### CATEGORÍAS RELACIONADAS

#### *A Campa do Fieiró*

A Campa do Fieiró está situada na Serra dos Ancares, concello de Cervantes (Lugo).

Un home de Degrada, dunha casa coñecida, foi a Castela. Daquela ían moito ás segas...

Ó chegar a Valladolid sentiu a unha rapaciña que estaba nun balcón lendo nas lendas do Fieiró de Arriba. O home quedou escoitando e dixo:

□ ¡Pero se iso é do noso pobo!

A rapaciña ía dicindo:

□ ... na primeira uceira, na que dea o sol a mañá do día do San Xoán, hai debaixo unha arca chea de ouro.

O home xa non foi para as segas. Díxolles ós outros:

□ ¡Eu non me encontro ben! ¡Vou volver para a casa!.

E volveu porque antes críase máis nestas cousas. Téñense encontrado moitas cousas...porque esto é verdade.

Aquí non hai conto. Isto foi realidade porque a proba está na campá; o que non están son as moedas.

Ben... Deu a volta e viña pensando na riqueza que lle estaba esperando.

A véspera do San Xoán chamou a un veciño e díxolle:

□ ¡Ai, ho, tes que vir comigo ata as brañas que teño que ir buscar unhas reses que me faltan. Non viñeron e para ir so, teño algo de medo, porque xa sabes que hai moitos lobos e por aí arriba éche o corredor deles.

E foron e pasaron a noite por aí arriba por se vían algo. El xa sabía que non ían atopar nada porque tiña todo o

gando na casa pero ó amigo non lle constaba tal cousa.

Cando foi día mandou ó amigo para a casa e díxolle:

□ ¡Vaite para a casa que agora xa me amaño eu so. ¡Xa mirarei por aí! ¡ Quen sabe para onde marcharon!. Así que quedou só, foi ó Fieiró de Arriba e cando saíu o sol fixouse na uceira onde daba primeiro o sol e despois marchou para a casa.

Para o día seguinte levou un pico e empezou a descubrir a uceira, quitouna e debaixo había unha tapa que cubría a arca que estaba chea de ouro.

En veces foi baixando o tesouro para a súa casa e botouno nun baúl deses antigos que tiña por pechadura un atume cun viorto de aceiro.

Este home tiña un sobriño que era rapaz novo e que cando lle parecía íalle sacando do baúl o que lle facía falta. Ata que ó pasar unha temporeada o tío foi mirar e notou coma se andaran os ratos, e dixo:

□ Aquí andou o sobrín. ¡Debeu se-lo sobrín!

Porque os outros que vivían na casa eran todos irmáns e eran do seu tempo.

□ Levou algo, teño que ter cuidado□ pensou , e díxolle ós outros irmáns□ ¡Parece que me anda o sobrín no Neal porque encontrei alí algo de falta!

□ ¿E canto che levou logo?

□ ¡E eu que sei que levou!

□ ¡Pois se non o sabes tampouco tes que ter pena! ¡Cando non o sabes é que moito non afondaría!

Outro día ía á leña de cocer ...

Un veciño estivera arando no barbeito que hai arriba da estrada da Campa da Braña e encontrara un penedo amarelo, redondo, da forma dun calabazón e tirouno para unha finca que estaba máis para abaixo e que era de outro. Este cando o viu tirouno para máis abaixo.

Ó pasar por alí o dono do tesouro e ver aquel penedo amarelo deulle coa cota da fouce e escachouno: ¡Todo cheo de moedas! Colleunas e meteunas coas outras.

De alí a unha temporada grande, queima a casa e ardeulle todo.

Despois déranlle algo pola borra, pero pouco foi se cadra aínda ía algunha moeda coa cinza...

¡Sorte con desfortuna! ¡ Alegría con tristura!

[Texto remitido por José María Carricoba Armesto, Lugo]

## **BIBLIOGRAFÍA**

FONTE:

Esta lenda foi recollida a principios da década de mil novecentos noventa, sendo o informante Jesús, da Casa de Armesto de Vilarello de

Donis, Cervantes (Lugo).